



Submisaun ba Parlamentu Nasionál RDTL

Hosi
La'o Hamutuk

Projetu Lei No. 5/III no Projetu Lei No. 9/III

30 Juñu 2016

Konteúdu

Pensaun nudár direitu ba sira ne'ebé la aguenta kaer servisu	1
Alterasaun tenke konsidera justisa sosiál no ekonomia	2
Parlamentu tenke hametin prinsipiu sustentabilidade finansial	3
Remata	3

Introdusaun

Ba dahuluk liu, La'o Hamutuk hakarak fó ami nia agradesimentu ba Parlamentu Nasionál ne'ebé fó ona konvite ba ami atu bele apresenta ami nia opiniaun kona-ba Projetu de Lei Pensaun Mensal Vitalisia ba Deputadu no Titulares hosi órgaun soberania sira.

Nune'e mós ami fó ami nia apresiasaun ba Bankada Parlamentár Fretilin no PD ne'ebé fó ona sira nia ezbosu ba alterasaun Lei No. 1/2007 no Lei No. 7/2007 sira ne'e. Ami espera katak sujestaun sira ne'ebé ami hato'o ne'e bele ajuda Parlamentu hodi halo desizaun ida ne'ebé matenek liu hodi promove justisa sosiál no ekonomia ba povu Timor-Leste laran tomak.

Ami nia komentáriu mak hanesan tuir mai ne'e:

Pensaun nudár direitu ba sira ne'ebé la aguenta kaer servisu

Bainhira Primeiru Lejislatura diskute no aprova Lei Pensaun Vitalisia ba órgaun soberania hirak ne'e iha tinan 2007, laiha audiénsia públiku ida mak Parlamentu hala'o hodi rona perspetiva hosi sociedade sivil n públiku, maske iha tempu ne'ebá iha protesta barak mak akontese.

Ohin loron, Parlamentu muda ona nia polítika hodi hakarak rona no akomoda halerik públiku nian ba polítika pensaun vitalisia nian. La'o Hamutuk apresia ba vontade polítika ba alterasaun ida ne'e, no ami fiar katak alterasaun ida ne'e la sees hosi presauun polítika ne'ebé povu sira hato'o dezde tinan

hirak kotuk ne'e liu hosi manifestasaun Pasifiku ne'ebé estudante Universitáriu no lider komunitária sira organiza.

Projetu de Lei No. 5/III ne'ebé hato'o hosi Bankada PD, propoin atu hamenus persentajen pensaun mensal vitalisia nian ba eis-deputadu/a no membru Governu sira hosi 100% ba 65%, no mós pensaun ba eis Prezidente Repúblika no eis Primeiru Ministru ba 75% hosi sira nia saláriu mensal bainhira sira nia idade to ona 55.

Entretantu tuir Projetu de Lei no 9/III (4a) hosi Bankada Fretilin propoin atu hamenus to'o 60%, maibé ba eis-deputadu sira ne'ebé ejerse nia funsaun to tinan sanulu bele hetan nia direitu pensaun 75% no ba sira ne'ebé ejerse funsaun to tinan 15 sei iha direitu ba 90% hosi sira nia saláriu báziku bainhira sira nia idade to ona 50.

Dezde Parlamentu Nasionál hahú nia Segundu Lejislatura iha 2007, saláriu baze mensal ba membru Parlamentu sira aumenta maka'as liu 100% kompara ho saláriu durante primeiru lejislatura nian. Tanba ne'e, ami konsidera katak persentajen ida ne'e seidauk hatudu seriedade hosi Parlamentu Nasionál rasik.

Ami hare katak pensaun nudár forma polítika protesaun sosiál ida ba ema hotu atu ajuda sira hodi bele iha resiliensia ekonómiku ba sira nia moris, bainhira sira nia idade labele aguenta atu kaer servisu todan. Infelizmente, projetu lei rua ida ne'e kontinua konsidera pensaun nudár forma atu hatuur priviléjriu sosiál no ekonomia ema ida nian.

Tanba ne'e, ami sujere atu:

- Másimu montante pensaun ba órgaun soberania sira hotu la bele liu 40% hosi sira nia saláriu baze mensal nian, hafoin sira ejerse mandate durante mínimu lejislatura ida tuituir malu. (pensaun ho 40% ne'e ekivalente ho maizumenus 85% saláriu baze mensal deputadu/a sira nian iha primeiru lejislatura)
- Idade ba eis-deputadu sira ne'e bele ona simu sira nia pensaun vitalisia ida ne'e tenke to ona iha 60 hanesan ho idade povu bai-bain sira ba pensaun idozu sira.
- Kada fulan, membru órgaun soberania sira tenke tau mínimu 20% hosi sira nia saláriu baze mensal ba iha "Fundu Pensaun" ne'ebé sira sei simu iha futuru.
- Membru órgaun soberania ida ne'ebé komete ona krime ruma hanesan involve iha kazu korrupsaun, tenke lakon nia direitu tomak ba pensaun ida ne'e.

Alterasaun tenke konsidera justisa sosiál no ekonomia

Ami hanoin katak asisténsia saúde ne'ebé di'ak, no mós atu hetan asisténsia servisu transportasaun ida ne'ebé seguru nudár parte ida direitu universal ba ema hotu nian. Konstituisaun RDTL Artigu 57.1 hateten katak *"Estadu hatene katak ema hotu iha direitu ba saúde, asisténsia médiku sanitaria, no mós devér atu defende no promove direitu ne'e"*.

Artigu 4 (Outras regalias) hosi Projetu Lei no 5/III no Artigu 5(Outros direitus) hosi Projetu Lei No. 9/III ne'e kontinua halo diskriminasaun entre direitu povu bai-bain ho membru órgaun soberania ho nia família sira. No mós viola prinsipiu universalidade no igualdade iha Konstituisaun RDTL katak sidadaun hotu-hotu hanesan iha lei nia oin, no mós iha direitu no obrigasaun hanesan.

Ohin loron iha ema barak mak tenke lakon vida tanba de'it ai-moruk ne'ebé falta, hospital rai laran ne'ebé laiha ekipamentu médiku, no falta doutór no enfermeiru sira. Ami hanoin katak polítika ida ne'ebé di'ak liu ba deputadu/a sira iha Parlamentu mak tau husu ba Governu atu aloka osan barak

ba setór saúde iha rai laran hodi nune'e ita nia ospital sira bele kura povu sira nia moras, inklui deputadu/a no nia familia sira.

Aleinde ne'e, direitu atu importa veikulu ida ba uza pesoal, livre hosi taxa tuir Artigu 4. (b) Projetu Lei No 5/III nudar politika ida ne'ebé la justu. Dezde lejislatura segundu, deputadu sira ne'ebé simu karreta Pajero halo ona leilaun karreta sira ne'e ba sira nia an, tuir mai iha lejislatura terseiru nian, deputadu/a sira hotu hetan karreta Prado ida tan ne'ebé iha poténsia boot ba "leilaun segundu rounde" nian.

Tanba ne'e, ami konsidera provizaun ida ne'e nudar aktu korrupsaun politika ida ne'ebé fó de'it vantajen ba elite politiku sira duke povu Timor-Leste. Tanba artigu ida ne'e la promove justisa sosial iha Timor-Leste, ami sujere atu halakon de'it. Di'ak liu Parlamentu Nasionál promove politika transporte ida ne'ebé seguru ne'ebé bele fasilita ema hotu, inklui eis deputadu no nia familia sira.

Parlamentu tenke hametin prinsipiu sustentabilidade finansial

Daudauk ne'e, Timor-Leste nia ekonomia depende ba rekursu naun renovavel petroleum ne'ebé sei hotu iha tinan balu oin mai. Ita nia kampu mina-rai Kitan maran ona iha tinan kotuk, no Bayu Undan ba tinan hat mai tan. Governu rasik daudauk ne'e halo hela politika reforma fiscal ida ne'ebé akontese tanba de'it ita nia rendimentu estadu nian sempre ki'ik liu kompara ho despeza tinan-tinan. Bainhira ita nia estadu la bele muda politika fiscal nian ohin loron, ita sei hasoru problema ekonomia iha tinan sira balu oin mai.

Dezde iha tinan kotuk, Parlamentu Nasionál mós konkorda atu Timor-Leste adopta prinsipiu dezvoltimentu sustentável ne'ebé atu ajuda Timor-Leste bele hasees an hosi pobreza, hamlaha no ekonomia ne'ebé fraku.

Ami apresia esforsu ida nee, maibé ami hanoin katak prinsipiu dezvoltimentu sustentável ida nee tenke implementa iha pratika. Bainhira Deputadu sira hamenus sira nia benefisiu pesoal sira, ita boot sira kontribui ona atu halo poupanza ba finansa publiku nian, no ajuda estadu atu uza osan sira ne'e ba redusaun pobreza, halakon hamlaha no fornese bee mós, edukasaun, infrastrutura no saúde ida ne'ebé adekua liu ba povu Timor-Leste.

Remata

Maske ami konkorda katak eis membru órgaun soberania sira tenke iha dignidade, maibé ami hanoin katak dignidade ida ne'e la bele sura de'it ho benefisiu hosi osan publiku nian. Dignidade órgaun soberania sira ne'e sei mosu bainhira sira rasik bele halo politika dezvoltimentu ida ne'ebé fó valor no benefisiu ba povu tomak bainhira sira sei kaer ukun.

Ami fiar katak povu sei kontinua vota ita-boot sira bainhira ita boot sira deside, lidera no tau matan ba futuru Timor-Leste nian ho justu no domin.

Mak ne'e de'it ami nia submisaun ida ne'e ami hato'o, ba konsiderasaun tomak, la haluha ami hato'o obrigado barak.

Ami be saran lia,



Juvinal Dias

Peskizadór sira iha La'ó Hamutuk



Celestino Gusmão